

## JA NØKY MIDI JA PABLO TYANĠGAJX JA COLOSĠT JAA'Y

*Ku ja Pablo tnijayi pøn tjanchja'widip ja nwindson'ajtim Jesucristo yja' jam Colosas kajpkøjxp*

<sup>1</sup> Pablo øts, øts ja Dios tø xamidsøky jøts øts ja tø xpikta'aky nwindson'ajtim Jesucristo kyudanaabyi. Jade'en'ampyts øts møøt ja Timoteo <sup>2</sup> ya'at nøky nja'ay jøts øø ndanijayi pøn jam Colosas kajpjotp ja'ajtidip ja Dios, pøn jaty jam tjanchja'widip ja Cristo, ja yiknitsokpi. Wants ja Dios Teety ttuñ ja may'ajt jøts ja myo'ojidit ja kunuu'kxin jøts ja myo'ojidit ja tuda'aky'ajtin.

*Sa ja Pablo tni'amidowi tni'bøktsowi pøn jaty ja Dios tjanchja'widip jøts ja ttukmadøy ja Dios*

<sup>3</sup> Ejtp øøts ja Dios ndukmøjawwi ndukunuu'kxyjawwi midi nwindson'ajtim Jesucristo tyedyip ku øøts ja' n'ajot'aty meets køjxp. <sup>4</sup> Tøts øø nnimadøy jøts ku meets ja nwindson'ajtim Jesús møk xjanchjawwi pøn yiktejp Cristo, jøts ku nayide'en xtsokti xpa'ayowdi ja mmigu'uk pøn jaty ja Dios ja'ajtidip, <sup>5</sup> ja'agøjxp ku tu'ugyi xjøp'ejxti midi myikmo'owandip midi jap pøkji'iky ejtp jap tsajpjøtpy. Tøts xnijawwidi tigøjxp xjagyapti ja jøp'ejxin, ja'agøjxp ku tø xmadowdi ja Dios kyajpxy ja Dios y'ayuujk, ja Dios tyiy'ajtin midi yiknitsokp. <sup>6</sup> Nay yø'øbi kajpxy nay yø'øbi madya'aky midi ojts myiktukmadowdi, janch

møjtak'adøtsp yø ixyam, jøts tum øy wyimbidsimy øy mādsoo wine'en ja naxwii'ñit, nayide'en jyaty sam tø mjatti kuyip xmadoo'okwandøø ja Dios chojkin ja pya'ayo'owin, jøts tø xnijawidi jøts ku yø tyiyi jøts ku yø yjanchi. <sup>7</sup> Yø'øxi øøts ja nmigu'uk Epafraas ojts mduk'ixpikyidi pøn øøts amuum nmøøtumpy jøts yjanchpaduujnip ja nwindson'ajtim yja' ja', jøts ja' meets idø'on jam tø mbudøkiyi. <sup>8</sup> Nay ja' øø tø xukmadøy sa meets ja tsojkin xjagyepy midi ja Espiritu Santo mmøøjyidip.

<sup>9</sup> Patyts ku øøts ja jade'en ja'ayi nnimadøøy, winetyipts øøts ja Dios nijuuni ngamimøñ meets køjxp, ejtp øøts ja n'amidøy jøts ja Dios yikxon mduknijawiyidit ja winmaa'ñ sa ja ttsøky, jøts ja mmo'ojidit wine'en ja wijy'ajtin kejy'ajtin, jøts nayide'en sa xnimadojidit ja Dios yja'. <sup>10</sup> Jade'ents øøts ja n'amidøy nbøktsøy jøts yikxon mjaa'y'attit sam idø'on pyaat'atyi ttu'undit pøn ja Dios ja'ajtidip, jøts tum ja' mdu'undip midi ja Dios tyajotkujk'ajtpy, midi øy midi tsuj wimbidsømp m'ødyu'uningøjxpti, jøts yikxon xnijawidit ja Dios. <sup>11</sup> N'amidøøpy øøts ja' jøts ja mmo'ojidit ja kyunuu'kxin ja myøk'ajtin, jøts xmidanidit øy midi ayo'on, jøts xyiktuda'aktit ja mwinnmaa'ndyi midi ne'egi mdajotkukidip, <sup>12</sup> jøts ja Dios Teety xukmøjawidit xukunuu'kxyjawidit jøts ku ja tø xanibiktaajka'am ku adøm xpaat'ajtyim jøts adøm ja xmøøyim mā ja kyunuu'kxin, midi ja yikmøødyip pøn jaty ja Dios ja'ajtidip. <sup>13</sup> Pø ja'axi tø xukniwaajchim mā amuum myajada'aky ja wimbeets'ajtin ja kugoots'ajtin yja', jøts ja tø

xyiktøjka'am ma ja Dios U'nk ja kutujk ttanitanı ja yjaa'y, <sup>14</sup> pøn ojts tyaky ja nıtso'ok'ajtin jade'en'ampy ku tø xku'o'jkandı jøts adøm ja xpojkpimee'kxyindi.

*Ku ja Cristo ojts xku'o'jkandı adøm nbøky, jade'en'ampyts ja Dios Teety jadigojk xmijotjimbijtyindi*

<sup>15</sup> Ka'ap ja Dios Teety yik'ixy yiknijawı, jade'en'ampyts ojts ñanky'ijxyı ku ja y'U'nk tyikmiñ, pøn tu'uk møj, ka' pøn jade'en. <sup>16</sup> Ja' Dios Teety tyukyik'øyiñ tuki'iyi ti jaty ejtp tsajpjøtpy, ti jaty ejtp naxwiiñ, midi kaxø'jkp midi kagaxø'jkp. Jøts ja tyik'øyi sa ja ankilistøjk ñagyutujkmø'øyiđi, ja'ats ja tyik'øyiñ jøts ja' ja tja'ajtp. <sup>17</sup> Jaayim ja yiknıtso'kpi wyinatyni, ja Cristo, jøtsnim øy ti kyaxi'ikñim, jøts ja' tuki'iyi tkø'ømit'ajtp ti jaty ja'ajtp. <sup>18</sup> Ja' tnigubajk'ajtp ja jaa'y pøn ja Dios yja'ajtpy, jøts ja' tjagyajp amuum yø'øbi jaa'dyi. Ja' tyikjujky'ajtp jøts ja' midu'uk tmimajadaajk ja o'jkin ku ja yjujky'ajtpy, jødsyim ja jøp'am ejtp tyimy'ity. <sup>19</sup> Ja Dios Teetyts ja kø'øm tyikjajt jøts ja tyikdiosjajty ja nwindson'ajtim Jesucristo amuum, <sup>20</sup> jøts nay ja' nayide'en tyikjajt nwindson'ajtim Jesucristo køjxp jøts ñamyi'øyatıđi tuki'iyi midi ejtp tuktsajp'agıda'aky, jøts yjotkujk'attı wan tjapønıđi midi ja'ajttıp naxwiiñ, jøts midi jap nayide'en tsajpjøtpyi. Jade'en'ampyts ja yjotkujk'ajtin ja ñamyayi tpaatti ku ja nwindson'ajtim Jesucristo y'ø'jky kruskøjxp.

<sup>21</sup> Ja mga'øwyinmaa'ñ ja mga'ødyunk ja' meets y'ijty myik'ejtıđip jagam ıxkø'øm, jøts m'am mjotp xmijotma'atti ja Dios; ja Diosts

tø myikjotkukiyidi jøts ja tø xmi jotjimbetti,  
 22 ja'agøjxp ku ja nwindson'ajtim y'øjky  
 jøts ja wemp ijxy tyimy'ats'ayo'ombaajty  
 ñikøjxp kyubajkp. Jade'en'ampyts ja  
 jade'en ttuun jøts meets ja Dios Teety  
 xwingunøjkxit ku tø mbøkwyatsnidi, niwine'en  
 mga'ukyikpøky'ejxnidit. 23 Jade'engøjxpts  
 chøkyi jøts tu'ugyi amumjoojt xyikyø'ødyit ja  
 mjanchja'win tiy'ajtingøjxp. Kidi meets ja  
 xkajøp'ejxni sa tø xnijawidi midi yiknitsokp. Yø'øbi  
 kajpxy yø'øbi ayuujk yikajpxwa'kxp øy sudso ya  
 naxwiin. Pablo øts jøts øts yam tø nyiktanipiky jøts  
 øts ja jade'en ngajpxwa'kxi ja yja'.

*Ku ja Pablo yiktanipiky jøts tpudøkit pøn jaty ja  
 Dios tjanchja'widip*

24 Jotkujk øts nnayjawiyi øy mee njagu'ayowi.  
 Nay jade'en ø ñamyayi ja ayo'on nbaaty sa ja  
 nwindson'ajtim Jesucristo ku ja tku'ayo'owiyiñ  
 pøn jaty ja janchja'wiyip. 25 Øts tø xaja'aty  
 jøts øts ja nbudøkidit pøn ja Dios tjanchja'widip.  
 Ja' øts ja Dios tø xanipiky jøts meets nmo'ot  
 ka'pxy ja Dios kyajpxy ja Dios y'ayuujk, 26 jøts  
 mee ndukmado'ot midi pøn tkanija'wipnim midi  
 y'ity yu'uch'ejtp, ma windi'ixyip ja jade'en pøn  
 tkanijawi. Ixyamts ja Dios ttuknijawiywa'lañ ja  
 jaa'y pøn jaty ja paduujniyip ja yja'. 27 Ja'ats  
 ja Dios ja tuknijawiywajnidip ti øy'ajtin idø'on  
 ja yjade'embì yjagyepy jøts ja yikmo'odit pøn  
 ka'israelit jaa'dyi. Jøts ja' idø'on y'ity kayiknija'wip  
 jøts ku ja Cristo ja' mee mjagyajpìp, jøts ja' tyajkp  
 ja jøp'ijxy'ajtin jøts ku nøjkx xpaajtidì ja Dios  
 y'øy'ajtin ja Dios chuj'ajtin.

28 Ja Cristo øøts ja yja' nnigajpxip, jøts øøts niduki'iyi øy pøn ngajpxwiyj jøts øø nyik'ixpiky øy pøn, jøts yikxon tñimado'odit, jøts jade'en nidu'uk nidu'uk tñijawidit yikxon ku tmøøt'etti ja Cristo. 29 Yø'øts ø nduñ'ajtpy jøts øts jade'en amumjoojt nnadyamiyøxyi, øy ø nwanjaty, ja'ats nyiktumpy ja Cristo myøk'ajtin midi øts ja xmøøpy.

## 2

1 Ja' ø ndsøjkpy jøts meets xnijawit sa mee ngamijotkuki ku øts ja Dios n'amidøy ja pudøjkin meets køjxp jøts nayide'en pøn jaty tsinaadyip jam Laodicea, nmijotigøøpy øts nayide'en ja nmigu'uk pøn ø xka'ijxy'ajttipnim. 2 Ja'ats ø ndsøjkpy jøts xjagyaptit ja tsojkin amumjoojt nixem niyam midi ja Dios yja'ajip midi øy midi tsuj pidsømp, ku ja awejx'ajtin xjagyaptit jøts xja'gyukidit sa xnijawidit ja Cristo pøn ja Dios nugo ajawi ka' pøn ttuknijawi; 3 ja'ats idø'øn tmøøt'ajtp ja øy'ajtin ja tsuj'ajtin, ja wejin ja kajin. 4 Jade'engøjxp meets ya'at ndukmadøy jøts kidi pøn mwindaay'atyidi pøn tum jaayi tkajpxtip. 5 Øy ø kø'øm nguidy-imyjam'aty, jamts øts ja nwinmaañ nyik'ity, jøts ndaxondakpy øts ku ø nnijawi ku øy yikxon xundi jøts nayide'en ku tu'ugyi xjanchjawidi ja Cristo.

6 Paty ja'ayi xu'undit midi tsojkip, sa myiktani'ejxidi myiktaguwanidi ku xjanchja'wiy'okwandøø ja nwindson'ajtim Jesucristo, ja'ats idø'øn tu'ugyi mdu'undip jøts ja jade'en møøt m'ettit. 7 Ja' amuum mnadyagidøkiyidip jøts ja' idø'øn mmøk'ajtin'attip. Ja'axi mjanchjawidip sa ojts myiktani'ejxidi myiktaguwanidi jøts jade'en ejtp ja Dios

xukmøjawidit xukunuu'kxyjawidit sam ja tø xnijawidit ku ja ixpøjkin myikmøødyi.

*Ja øchinaa'yin midi yikpatp Cristo køjxp*

<sup>8</sup> Øyim mnay'ejx'etidit; kidim ja xmibøkti ja jaa'y pøn mdawin'øønwanjidip ja ixpøjkin, midi wenk winmaa'ñ tyikyø'ødyip uk midi tyiktundip ja tum ja taay; ja' ja yiktundip sa ja jaa'y chinaa'yindi sa jaa'y wyinmaa'ndyi, ka'axi ja tyikmøjtøjkiiyidi ja Cristo yja'.

<sup>9</sup> Pø ja Cristoxi kø'øm amuum tmøøt'ajtkøjxp ja Dios'ajtin, <sup>10</sup> jøts kumi mmøøt'ijtpy meets ja', tits mee mjaaka'ejtxip. Ja' tuki'iyi tjagyajp jøts ka'ap ja pøn myi'abaadyiyi, wan ja ma tyimyjatsoondi, wan tjamiku'ku'pyi uk wan tjanayjapi tsajpjøtpy. <sup>11</sup> Ku meets ja jade'en xmøøt'ity ja Cristo, tø meets ja ñamyayi mbiktaajkxiyi ja ejxa'anin kyunuu'kxingøjxp, ka'apts ja nayide'en tø mbiktaajkxiyidi sam ja israelit jaa'y ñadyuñidi. Ja' mee m'ejxa'anin'ajtpy ku xpaatti ja nitso'ok'ajtin jøts ja mbøky mniwa'achidi midi yiktump ku ya naxwiiñ njaa'y'ajtyindi. <sup>12</sup> Ku ja nøbajtin xpaatti, jade'en meets idø'øn ñamyayi ja Cristo møøt m'ø'jky, jøts nayide'en ñamyayi mjujkpyøjkti, ja'agøjxp ku tø xjanchjawidi ja Dios, pø ja'axi ja myøk'ajtin majadaajk ku ja Cristo yjujkpyijky. <sup>13</sup> Jade'en ja ngajpxin, øøky meets y'ijty myik'ejtniyidi ja mbøky ku ka'anin ja ejxa'an xpaatti, midi yikpatp nwindson'ajtim Jesucristo køjxp; xjats ixyam ja Dios tø mmø'øyidi ja juiky'ajtin jøts mee ñamyayi møøt mjujky'aty ja nwindson'ajtim Jesucristo, ja' mee mmaa'kxiip tuki'iyi ja mbøky. <sup>14</sup> Tøts ja Dios tjibiky ja kutujk jøts

ka' y'uktunıt̄ midi y'ijty myiktanigutujk'ajtip, midi y'ijty xjanch'adsejpinđip jøts ja xuktaja'jtyinđi ja nbøky jøts adøm ja yiktagubejtyinđi. Jade'en'ampy ja Dios ja tyikudigøøy ku ja nwindson'ajtim kyiruspejty. <sup>15</sup> Ja'ats ja tyamimajadaajk ja miku' jøts ja tøm tyik'amutskiyi ja myøk'ajtin jøts ja jade'en ttuk'ixy ttuknijawı ja naxwii'ñit jaa'y.

### *Jotmay'atti ja Dios yja'*

<sup>16</sup> Jade'en'ampyts ka' pøn xmøjpkıta'aktit ku pøn mdabayø'øwya'andit ja mgaajyk ja m'uujkikti, uk ku ja xøøw xkabadundi midi winsamaan jøts midi wimbo' yiktump. <sup>17</sup> Ja' yøm y'ity wya'añ jøts yøm tñigajpxy midi menwamp, ya'at tsinaa'yin y'ijty tunkpatp ku ja Cristo kyamiñim ku ja jaa'y ja tjøp'ejxti. Kuts ja tøm myiñ, ja' idø'on tu'ugyi yikjanchja'wiñip. <sup>18</sup> Kidits ja jaa'y mdukmajtstu'udyidi ja nwindson'ajtim pøn ñadyijyi janch tuda'aky nabyiktaajkidip, jøts wya'andi ku ja ankilis ne'egi yikwindsø'øgit. Ja' ñigajpxtip ñimadyaktip midi nijuuni kya'ejxtipnim kyamadoodipnim, jøts jade'en øy ñadyamøjpkıta'agyidi ja kyø'ømwinmaa'ñ. <sup>19</sup> Ka'ap ja tmøøt'etti ja Cristo, pøn møj pøn jøp'am, pøn yikmøja'wip, jøts pøn amuum yikjanchja'wip ku ja yja' ja yiknijawı jøts jade'en tyika'pxy'ity ja jaa'y pøn nayide'en myøøpy ja møk'ajtin, sam ja Dios kø'øm tøm ttanibiktaagi.

<sup>20</sup> Pøni janch idø'on ku ja Cristo namyayi møøt tøm mjantyimy'ookti, t̄tigøjxpts ku jade'en mdsinay'adø'øtsti sam ja'ajinđi, pøn ja Dios yja' tkabaduujnıđip? Ja' yikmajadaktip jøts ñadyanigutujk'atyidi ja kyø'øm'ana'amın, <sup>21</sup> ku

yide'en ñay'ane'emyidi: “Kidi yø' xjii'kxy, uk kidi yø yjade'embì xjii'kxy, kidi yø xõñ.” <sup>22</sup> Yø yjade'embì ana'amin, tum ja' yø ñi'ane'empy midi waani ejtp jøts ja ñajxni jade'en sam o ti pikta'aky midi tø tyuñ jøts ja ka' ti y'ukwani, jade'ents ja jaa'y ja kyutujk jade'en ja y'ixpøjkin. <sup>23</sup> Øy idø'øn ja yjawì njantyiyja'wa'ant, jabi øyxi ja yik'ayowim yikpadu'unt tsø'øgi køjxp. Nitits ja kyawa'añ, kaja'ajipxi xpudøjka'am jøts nbøky xniwaajtsint.

### 3

<sup>1</sup> Jøts kumi tø mee ñamyayi mjujkyiky nayide'en ku ja nwindson'ajtim Jesucristo yjukpyiky, ja'agøjxp xjotmay'ajtidit ja nwindson'ajtim yja', pø ja'axi ja Dios Teety amuum tø myø'øyi ja møk'ajtin. <sup>2</sup> Ja' ejtp mwinmaa'ñ'attip midi ja Dios yja'ajip jøts ka'ap ja xyikmøjtøkidit midi ya naxwiiñ. <sup>3</sup> Jade'ents ngajpxin ku ja Cristo y'ø'jky jøts mee ñamyayi nayide'en tø m'øøky, ka' x'uktatøjkiñidit ja ka'øybi midi ya naxwiiñ. Ja nwindson'ajtim mee mgøjø'ømit'ajtniyidip jøts mee mjujky'aty xemikøjxp ma ja Dios, <sup>4</sup> jøts ku ja Cristo kyaxø'økt nayide'ents meets ja wyinaty møøt mgaxi'iky jøts meets nayide'en ja y'øy'ajtin ja xyondaajkin xpaajtiyidit.

#### *Ja øchinaaq'yin jøts ja ka'øchinaaq'yin*

<sup>5</sup> Paty x'ixmatstit tuki'iyi ja ka'øybi: ka' pøn ama'tskjaa'y tmøøt'att ja wenk yaa'dyøjk uk ja wenk tø'øxyøjk, ka'ap ja axøøk winmaa'ñ xyiktu'undit, jøts nayide'en ka' ti x'ama'at'attit. Jade'en yø tuki'iyi tpaaty ku yø xu'undit ejximdam jeexyip xwindso'øgidi ja awanax ja agojnax. <sup>6</sup> Yø'øgøjxp



ja Dios tkexy ja ayo'on jøts ja ttuktagida'aky ja yjade'embj jaaj'y pøn ja kamimadojyiy; <sup>7</sup> jøts ku y'ity ka'anim xjanchja'wiyidi ja Dios yja', tuki'iyi meets yø y'ity nayide'en xuñ. <sup>8</sup> İxyamts, İxmajtskøjxnidi yø ka'øybi, yø ambøjkin, yø axøøk winmaa'ñ, yø ka'ødyu'unin, yø nawyিংajpxnaxi jøts yø ka'øy'ayuujk. <sup>9</sup> Kidi mnawyindaay'atyidi, pø tøxi x'ixmatsti sa y'ijty mjaaj'y'atti, ti jaty y'ijty mdundip. <sup>10</sup> Tøts ja Dios myiktigachidi jøts ja yjembyi tø xpadøkidi, pøni sa meets ja yja' xjanchja'wiyi, nayide'ents meets ja myiktigachi kunim yikxon xtyimñijawidit sa ja Dios. <sup>11</sup> Jøts ka' chøkyi wan pøn tgriegitjaaj'yi uk t'israelitjaaj'yi, wan ja t'ejxa'aninmøødidi uk tka'ejxa'anmøødidi, wan ja abiky ma ttsoondi uk wan ja tja'ajidi pøn ja Dios tkanija'widipnim. Yjaja'ajidi ja' pøn tmidundip ja windsøn, uk pøn najtspøki ejttip, tum ja nwindson'ajtim Jesucristo ja' yja', jøts myøøt'ijtpy ja øy pøn.

<sup>12</sup> Mdsojkip meets ja Dios, ja'agøjxp meets ja tø mw'i'ijxyi jøts ja tø mja'bikyidi. Tsøønidits yikxon. Yiktundi ja øy'ajtin amuum, ja ayo'ejxin, ja jotwa'añ'ajtin, ja windsøjkin, ja wijy'ajtin jøts ja tuda'aky'ajtin. <sup>13</sup> Namyiduda'aky'atidi xem yam jøts namyaa'kxukidi ku pøn ti ttuñ jøts ja myigu'uk tpøky'ixy. Nayide'en xu'undit sam ja nwindson'ajtim Jesucristo mbojkpimee'kxyidi. <sup>14</sup> Ka'apts ti jade'en sam ja tsojkin sam ja pa'ayo'owin, ja'ats idø'øn myiktu'undip, pø ja'axi amuum tsojkip, ja'axi øy ti tyik'øgyaxø'kp jøts niti jadu'uk jade'en abiky kyatsøkyi. <sup>15</sup> Ja Diosts ja yjotkujk'ajtin, ja Diosts ja xyondaajkin

mwinmaa'nmyo'ojidip, pø ja'agøjpxxi ja Dios tø mdukupabikyidi ja yja' jøts ja'abi jotkujk'ajtin xyiktu'undit ni'amuki niwine'en ja Dios xja'ajtyindi. Tukmøjajawidits tukunuu'kxyjajawidits ja Dios.

<sup>16</sup> Jøts ja'gyukiyidi yikxon ja nwindson'ajtim Jesucristo kyajpxy ja y'ayuujk jøts ja xwinmaa'n'attit. Nadyuk'ixpøkidi jøts nagyajpxjot'amøjkiiyidi nixem niyam, ja wejin ja kajin myiktu'undip. Øøjidi ja Salmos, jøts øøjidi ja kunuu'kxkyajpxy jøts jade'en xukmøjajawidit xukunuu'kxyjajawidit ja Dios. <sup>17</sup> Ku ti xunwa'andi uk xkajpxwa'andi, ja nwindson'ajtim Jesús myøk'ajtin myik'awajnidip, jøts jade'en'ampy ja xukmøjajawidit xukunuu'kxyjajawidit ja Dios Teety, ja' myøk'ajtingøjxp.

*Sa yjaa'y'attit pøn tjanchja'widip ja Cristo o madsoo*

<sup>18</sup> Jøts ja tø'øxyøjk pøn amajtskti, mimadowdi ja mnijaa'y, jade'en pyaat'atyidi pøn tjanchja'widip ja nwindson'ajtim. <sup>19</sup> Jøts nayide'en ja yaa'dyøjkmidi pøn amajtskti, yikxon xjagyaptit ja mnidø'øxy. Kidi møøt atsep a'aki mdsøønidi. <sup>20</sup> Jøts u'nk una'jkmidi, mimadowdi ejtp ja mdeety ja mdaak, jade'en ja Dios ttsøky. <sup>21</sup> Jøts u'nkteety u'nktaak nayide'enmidi, ka' nugo xyik'ambøktit ja m'una'jk jøts kidi t'ayojidi. <sup>22</sup> Jøts pøn midundip, mimadowdi ja jaa'y pøn mwindson'ajtip, jøts kidi jaayi nugo nadyijyi myujy'atti ku ja m'ijxyidi jøts ja jade'en nugo m'øyjawiidit. Mdu'undipxi dø'øn sam pyaat'aty Dios wyindsø'jkingøjxp. <sup>23</sup> Yikxon xu'undit ku ti xunwa'andi, ja Dios

meets ja mdamidumpy jøts kidi ja jaa'yip øy ja' mjayiktuñidi. <sup>24</sup> Tøts xnijawidi jøts ku ja nwindson'ajtim mmo'ojidit ja øy'ajtin jøts meets ja mdukpaadit ja kyunuu'kxin. Kumi Cristo meets ja yja' mdu'unxip, nay ja' meets ja køøm mmo'ojip. <sup>25</sup> Pønts ja kya'øysi ttump, nayide'ents ja ka'øy'ajtin ja tikmo'odit. Ka'ap ja Dios ja t'ixy wan ja tjapønidi, tuknax ja tum jade'en ttu'unt pøni sa tø yjaa'y'atti.

## 4

<sup>1</sup> Jøts meets windsøn pøn ja tunk tmøøt'ajttip, øy yikxon mjaa'y'attit jøts jade'en xyiktu'undit ja mdumbi sam pyaat'atyi. Ja'myatsti jøts ku ja nwindson'ajtim jap tsajpjøtpy midi mee mwindsøn'ajtmip.

<sup>2</sup> Kidi mjotmondi, ejtp ja Dios x'ajot'attit, ejtp ja øy ti xukmøjawidit xukunuu'kxyjawidit.

<sup>3</sup> Amidowdi pøktsowdi jøts øøts ja nwindson'ajtim ja nnøø' ja nduu' xyik'awajtsit, jøts øøts ja ngajpxwa'kxit ja y'øgyajpxy ja y'ømyadya'aky, jøts nayide'en yiknigajpxt wa'ats ja Dios Teety wyinmaa'ñ, sudso ja nitso'ok'ajtin yikpaaty Jesucristo køjxp, ja'axi øts yam mgudsumchinaa'yip, pø ja'axi ngajpxwa'kxpy.

<sup>4</sup> Ajot'attits Dios jøts øts ja kyajpxy ja y'ayuujk øy pøn nduknija'wiyit sam idø'øøn pyaat'atyi ndu'unt.

<sup>5</sup> Øy yikxon mjaa'y'attit, migu'ukwa'andi pøn ja Dios yja' tkania'wip jøts ttukmadowdi, kidi ja xøøw ja jumøjt nugo xyikwindigøydi. <sup>6</sup> Øy tsuj ja mmadya'aky xyikpidsøømdit, jøts mjattip nayide'en ja adsojimbejtk sa nidu'uk nidu'uk øy pøn x'adso'odit.

*Ku kyajpx'abaadiwya'añ jøts ja kajpxpoo'kxin t'ukyajkni*

<sup>7</sup> Ja nmigu'uk Tíquico meets jam mdukmadowip sa øts yam. Janch øy yø pyudøki, janch tsuj tmiduñ ja Dios. Tø øts yø nmøøtwidity. <sup>8</sup> Paty meets ja yam ndaniguexy jøts ja mgajpxjot'amøjkiyidit, jøts ja nayide'en mdukmadowidit sa øøts yam. <sup>9</sup> Ja Onésimo ja jam møøt ñijkxy, adøm ja nmigu'uk pøn amumjoojt tpaduujnip ja Dios yja'. Meets yø' mjaa'y. Yøøts meets ja mdamimadya'agip ti yam tuujnip jajtíp.

<sup>10</sup> Jøts øts ja nmigu'uk Aristarco pøn øts yam nmøøtsumchinaapy, ja' yam nayide'en mdanigajxidip ja kajpxpoo'kxin, jøts ja Marcos nayide'en ja yja' tkajxmi, ja Bernabé ja myigu'uk. Tøts ja myiktukmadowdi ja Marcos; pøni mbaajtidip jam, øy yikxon xkupøktit. <sup>11</sup> Nayi mgajpxpoo'kxidip ja Jesús pøn nayide'en yiktejp Justo. Yøøyi døøon israelit jaa'y'ajttip pøn tmidundip ja Dios, pøn ø tø nmøøtundi, jøts yø' øts yam njanchtajotkujk'ajttip. <sup>12</sup> Nayi mdanigajxidip ja kajpxpoo'kxin ja Epafraas pøn ja nwindson'ajtim tmidump, nay meets ja mjaa'y. Ejtp ja mni'amidowiyidi mnibøktsowiyidi ku Dios ja t'ajot'aty jøts tu'ugyi øy yikxon xpanøjkxtit ja Dios, uk amuum mnadyamiyoxidit jøts ja xu'undit sa ja ttsøky. <sup>13</sup> Kumi wa'ats ø n'ixy nnijawi sa ja Epafraas mdajotigøyi, jøts nayi tyajotigøøpy ja nayide'en pøn tsinaadyip jam Laodicea kajpkøjxp jøts jam Hierápolis kajpkøjxp. <sup>14</sup> Nayi mgajpxpoo'kxidip ja Lucas, pøn tsøyip jøts nayide'en ja Demas.

<sup>15</sup> Kajpxpoo'kxtits adøm ja nmigu'uktøjkti pøn ja

Dios ja'ajtidiip midi tsinaadyip jam Laodicea, jøts nayide'en xkajpxpoo'kxtit ja Ninfas møøt ja'adi pøn ja Dios tjanchja'widip, pøn jam namyujkidip ja' tyøjkjotp. <sup>16</sup> Ku yø nøky x'uk'ejxkøxtit winets ja xanigaxtit jøts wan t'ejxti pøn ja Dios tjanchja'widip jam Laodicea, jøts meets ja nøky nayide'en x'ejxmit midi jam tso'omip. <sup>17</sup> Jøts nøjmidi ja Arquipo jøts ku ka'pxy tpadu'unt sa ja nwindson'ajtim tø tyunkmø'øyi.

<sup>18</sup> Øts njaapy ya'at kajpxpoo'kxin jøts meets ja ndaniguexy. Jøts xja'myatstibim øts ku Dios x'ajot'attit jøts ku øts yam ndsumy'ity. Dios mgunuu'kxidip. Jade'en idø'øn ja yjatt.

**Ja ɔgyajpxy ja ɔmyadya'aky midi xukpaajtimp  
ja nitso'ok'ajtin  
New Testament in Mixe, Tlahuitoltepec  
(MX:mxp:Mixe, Tlahuitoltepec)**

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

**Copyright Information**

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixe, Tlahuitoltepec

**© 1987, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

422dcf73-46a5-5403-b423-8406ed76ac1d